

Guijtz Nani Bacuaa Pabl Lo Rebeņ Roman

Rucuaa Pabl lo rebeņ guidoo nen guedx Roma

¹ Narä, Pabl, nacä te xmos Jesucrist, laani gule narä te gusule'ä xtidx Dios loj rebeņ.

² Agujc xchero bia'n Dios diidx loj renani basule' xtiidxni, suniidxni diidxre loonu, luxh diidx ni bia'n Dios caj lo guiitz xten reprofetga.

³ Rediidx ni rusule'ä najc xcuent Jesucrist, Xi'n Dios, ni najc xagdoorei David xcuent tiejxhni.

⁴ Xcuent Xsprit Dxan Dad Jesucrist, najcni Xi'npac Dios. Badeed Dios yälrnibee lojni, ni'cni gubansacni lo rebeņgut.

⁵ Laani gucnäjni narä, guleni narä te gusule'ä xtiidxni te guzobdiajgtu, te chalilajz rebeņ ni rej guideb guedxliuj xtiidxni.

⁶ Luxh nadxaagtu loj rebeņ ni guleni te chalilajzreni xtiidxni.

⁷ Ruxhalä guiitzre lojtu ni yu' guedx Roma, guiraatu ni sanälajz Dios ni bibeetu gactu benđxan. Gacnäj Dios ni najc Xadnu näjza Dad Jesucrist la'tu, guscuecdxireni lajztu.

Rlajz Pabl chää guedx Roma

⁸ Ganidtoo rudedä xquixtios loj Dios con laj Jesucrist xcuent guiraatu, sa'csi guideb guedxliuj rujy beņ diidx xcuent xcälrililajztu.

⁹ Lagajc Dios anajn xho rniabä guet-guejt xcuent la'tu lojni. Narä runä xtzuun Dios guideb lastoä, rusule'ä diidx xcuent Xi'nni Jesucrist.

¹⁰ Sanuutis canabä lojni, top sajc jiädhuiä lojtu si'cni rlazä gunä agujc xchejli.

¹¹ Sa'csi rlazduxhä fiä lojtu, te gacnäätu, te gulidxä la'tu xhi te xtidx Dios te sudzu'tzrutu lo xtiidxni.

¹² Nalajznu, te gustioobnu lajz sa'nu xcälirililajz xtidx Dios xten sa'nu.

¹³ Rebetzä rlazä gacbeetu balti huält benä xhigab jiädhuiä lojtu, luxh gajd gacdi jiälä. Rlazä jiädhuiä lojtu te chalilajz xhidajlru bejn xtidx Dios sigajcni salilajzreni guiralajt cadro hua'a loj rebejn ni di gac xpen Israel.

¹⁴ Nungäjpac gusule'ä xtidx Dios loj rebejn nani rnii garen-garen didxsaj, sigajc loj rebejn griegw, loj renani nayääl, sigajc loj rebejn najn.

¹⁵ Rbaali lazä suga'a naj, te gusule' xtidx Dios näjza lojtu ni yu' guedx Roma.

Xcälribee xtidx Dios

¹⁶ Sa'csi dina guituiä xcuent xtidx Dios, sa'csi najcni yälribee xten Dios te guslaani lo dojl chutis bejn nani rlanj chalilajz xtiidxni, ganidtoo reni najc rexpejn Israel, dxejcti näjza rebejn ni di gac xpen Israel.

¹⁷ Sa'csi xtidx Dios rusule' xho nanab chalilajz te bejn te gacni te beñsa'c nez lo Dios sa'csi huililajzni xtiidxni. Lo xtidx Dios caj scree: “Palga rililajz te bejn xtidx Dios, najcni te beñnaya nez lo Dios, nabañnäjni Dios xcuent xcälirililajzni.”

Rextojl bejn

18 Xcälrdxe'ch Dios nani yu' xhaguibaa siajbni yejc rebejn nani gun dojl, nani rlajz gun cosguijdx, nani di gusaan guisieed sabejnreni didxguli.

19 Sa'csi anancheereni nani sajc gan bejn xcuent Dios, ni'cni najnreni rajpreni dojl, sa'csi ruluipac Dios na'c gunreni dojl.

20 Cheni birixtiejli guedxliuj, recos nani di gacdi fii bejn xcuent Dios, si'c xcälrnibeeni ni najc par tejpas, si'c xtujxh xtenni, huenliisi ruzenreni sa'csi ruluilojreni recos ni ruzen nani benchee Dios. Guiraa reni'c ruluiloj najcni Gueb Dios ni rajp yälrnibee par tejpas, ni'c di gacdi guiniireni loj Dios direni niembee xhini'c rlajz Dios gunreni.

21 Ni'cni, mase biembeereni Dios, direni niliä'p xpala'nni te ganreni Gueb Dios, dizareni nudeed xquixtios lojni. Alga guyalajz gujcreni, bicäy xcariajnreni, naareni hueen najc gunreni si'ctis ni jiajb yejcreni, si'cni rsia' lajzreni neñ lastooreni.

22 Caniireni nanduxhreni, per direni gan, nayäälreni.

23 Gulälazreni xcälrdimbicha' Dios ni najc tejsi par tejpas, te bazuxhijbreni nez loj rebanäjb ni benchee naareni, ni najc guiraa ni rujn lojni si'c rujn lo te niguii ni rnitloj, näjza guiraa ni najc si'c reman ni rutajt, näjza guiraa ni najc si'c reman ni yu' tajp ni'ni, näjza ni najc si'c rebäjl.

24 Ni'cni gulälaz Diosreni, basaanni gunreni si'ctis ni rlajzreni. Bejnreni dojl con resa'reni.

25 Sa'csi ahuililajzreni didx-xhii lacuaa nililajzreni xtidxlii Dios, ruzuxhijbza'reni nez loj recos ni benchee Dios, lacuaa guzuxhijbreni loj Dios nani benchee guiraa rexhicos, Dios nacle' par tejpas. Sugacni si'c.

26 Ni'cni gulälaz Diosreni, subia'nreni lo xcällatsiajreni, lo yälxtujy xtenreni. Diru regunaa guesnäjä niguii, lagajc sagunaareni resnäjäreni.

27 Sigajcza reniguii gulälaz regunaa, rujnreni dojl con lagajc saniguiireni. Luxh lagajc laareni siguijxreni latsiaj ni rujnreni.

28 Luxh sa'csi di rlajzreni jiureni Dios, basaanti Dios suyu' cosguijdx tis xcäriejnreni, te chanuutisreni lo xcällatsiajreni, rujnreni recos ni xhet laadi.

29 Guidxareni dojl, näjza cosguijdx, näj yäl ruguilajz xhixten sa'reni; rugu'treni bejn, rujnreni yälrsiäblajz, rucuanäjreni resa'reni, rusgueereni sa'reni, rdxechnäjreni sa'reni, rniizareni didxxhi.

30 Rnijaj sa'reni, rdxe'chreni lo Dios, gualajzreni, dipacreni guitujy, rliä'preni lagajc xpala'nreni, entis latsiacooob rbäxtiejreni, gualajzreni lo xcuzajnreni,

31 nadduxhreni, xheti xcäriejnreni, xhet sajcdi xtiidxreni ni ria'nreni lo sabejnreni, direni chanälajz sa'reni si'cni nungäj l gacni, dizareni gulaslajz sa'reni.

32 Luxh mase agucbeereni gun Dios yälguxhtis lojreni, najnzareni nungäj l guetpac renani rujn recosre, nicla jiureni, rujnreni guiraa recosguijdxre, luxh rbaali lajzreni richunäjreni rebejn ni rujnza recosguijdxga.

2

Dios rujn yälguxhtis con didxguliipac

1 Ni'cni, ¿canejz chäätu, la'tu benguedxliuj? Chutis luj ni rgubeelu sabejnlu, lagajc si'c cubeezareni

luj, lagajc xcuent ni'c sajclu yälguxhtis, sa'csi luj rgubeelu sabejnlu, lagajcza luj rujnlu lagajc dojlga.

² Nancheenu sujn Dios yälguxhtissa'c loj renani rujn sa' dojlga.

³ Beñ guedxliuj ni rgubee loj renani rujn dojl, luxh sigajcza rujnlu, ħla rujnlu xhigab sidedcaj gun Dios yälguxhtis lojlu xcuent xtojllu, ä?

⁴ O ħla rbälazlu ni rujn Dios, najcni huen-
duxh, lacti guroob najc xcälrulaslajzni, rapdux-
hzani pasens? ħLa dilu gan dee najc ni gacnäjl
gusiechlajzlu te guibicajlu lo dojl, ä?

⁵ Luxh sa'csi nadduxhlu, di lastoolu guigoodz
te gusiechlajzlu, cagutajllu yälguxhtis ni gaclu che
guidzujñ dxej ni gun Dios yälguxhtis loj reben
guedxliuj,

⁶ siguijx Dios loj tejpgatu xcuent dzuun nani bejn
tejpgatu.

⁷ Loj rebejn nani rlajztisreni guibañsa'c, ni
gusoob xtiidxni, sudeed Dios yälñabajñ par
tejpas sa'csi gudiilreni xhaniduj näjza go'preni
xpala'nreni loj Dios, rlajzreni guibajñreni loj Dios
par tejpas.

⁸ Luxh sidxe'ch Dios, sidxe'chduxhni loj renani
sanälajz lagajc laareni, nani di jiu xtidxguliini, alga
rusoobreni reyällatsiaj, redidxguijdx.

⁹ Guiraa reben guedxliuj ni rujn dojl sidejd tra-
bajwduxh näjza sac-huin lastooreni; ganid rexpən
Israel, dxejcti näjza reben griegw.

¹⁰ Loj guiraa rebejn nani rujn cos-hueen, sudeed
Dios xhaniduj, näjza bala'n, näjza yälrbecdx
lastooreni, ganid rexpən Israel, dxejcti näjza reben
griegw.

11 Sa'csi tebloj najc guiraasi rebejn nez loj Dios.

12 Guiraa rebejn nani bejn dojl, luxh direni niembee xleii Dios, sinitlojreni sin leiiga; guiraa reni biembee xleii Dios, lagajc con leiiga sujn Dios yälguxhtisreni xcuent xtojlreni.

13 Xhet ganaxdi renani rucuardiajgtis xleii Moisés najc bejnaya nez loj Dios; rebejn ni rusoobpac rexleii toMoisés, reni'c najc bejnaya loj Dios.

14 Yu' xhidal bejn ni di gumbee xleii toMoisés, dizareni gac rexpem Israel, rujnreni recos ni caj lo leii. Najnreni xhini'c najc cos sa'c. Ni'cni lagajc xcäriejnreni najc si'c leii par laareni.

15 Recossa'c ni rujnreni ruluiloj nezyusa'c ni yu' lastooreni. Xcäriejnreni ruluiloj xhini'c loj guiraa nani rujnreni najc cos sa'c, xhini'c najc dojl.

16 Guiraa recosre sajc che guidzujn dxej ni gun Dios yälguxhtis guiraa rehxigabxhiga'tz ni yu' lastoo rebejn. Jesucrist gac juejz lojreni, dxejc sisiojb guiraa rediidx ni cagusule'ä lojtu.

Rexpem Israel näj xleii toMoisés

17 Luj ni laalu xpen Israel, ni rniilu sanäpaclu xleii toMoisés, rniiduxhlu najclu xpen Dios,

18 rniilu nancheezalu xhini'c rlajz Dios gunlu, anajnzalu xhini'c najc hueenru sa'csi bisiedsa'c paclu leii.

19 Rchalolu sajc guluiilu nezyusa'c lo rebejn nani najc si'c lotiä'p, sajc guzaniylu xcäriejn reni nacäy xcäriejnreni.

20 Rchalolu najclu maestr lo renani nayääl, najczalu maestr lo rebiiuux, sa'csi nansa'clu leii, luxh lojni caj guiraa yäl najn näjza guiraa didxguliipac.

21 Ni'cni rniä lojlu, luj ni caguseed xtee bejn, ¿xhicient dilu guseed lagajc luj? Luj ni rusule'lu diidx na'c cuan bejn, ¿xhicient rbajnlu?

22 Luj nani rniilu na'c guesnäjni te ni di gac chäälni, ¿la resnäjlu nani di gac chäällu, ä? Rdx'e'chlu xcuent rebanäjb, ¿xhicient rbäälu xhicos neñ xquidoo rebanäjb, ä?

23 Luj rlanjzlu chä'p xpala'nlu sa'csi najnlu leii, ¿la rusanxtujylu Dios sa'csi dilu gusoob xtidx leiiga, ä?

24 Bahuii xho rebejn nani di gac xpeñ Israel rniyajreni Dios sa'csi la'tu ditu gusoob xtiidxni, rujntu dojl, sigajc ni caj lo xtidx Dios.

25 Palga la'tu chutu bee si'cni caj lo leiiga, palga gusoobtu guiraa diidx ni caj lo leii, laaca. Luxh palga ditu gusoob guiraliipac xtidx leiiga, xlia'si guyu'tu bee, sa'csi rujntu dojl.

26 Ni'cni palga te bejn ni di chu beega, luxh rusoobni guirliipac xtidx leiiga, ¿la di gacdi guchaagni cuent najcni si'c te nani yu' beega, ä?

27 Bejn nani di chu beega, luxh rililajzni guiraliipac xtidx leiiga, sujnni yälguxhtis la'tu sa'csi mase yu'tu beega, luxh nanduxhtu leiiga, ditu gusoob xtidx leiiga, alga rujntu dojl.

28 Sa'csi xhet guiraadi rebejn ni yu' beega najc rexpejn Israel, luxh di beega ni ru' bejn gun gusoobpac bejn xtidx leiiga.

29 Najcpac te xpeñ Israel nani najcni neñ lastooni, nani yu' bee lastooni, rusoobpacni xtidx Dios xcuent Sprit xtenni, dini gunni sa'csi najctisni costumbr. Dios ni siliä'p xpala'nni, xhet bejn di.

3

¹ ¿Xhini'c sacnäy te bejn najcni te rexpen Israel, ä? O ¿xhi sajc chuni beega?

² ¡Empac sacduxhni! Ganidtoo, sa'csi loj rexpen Israel badeed Dios xtiidxni.

³ Mase yu' renani di nililajz diidxga, ¿la ni'cni xhet sajc di diidx ni bia'n Dios loj rexpejn ni, ä?

⁴ ¡Xho gacni si'c! Diostis najc guliipac, guiralii bejn rusguee. Scree caj lo xtidx Dios: Lagajc xtiidxlu suluii laaca rujnlu, te che gaclu yälguxhtis, nicla tej xtojllu di guidxäjl.

⁵ Palga xcällatsiajnu ruluiiru najc Dios huenduxh, ¿xhini'c guiniinu dxejc? Palga gun Dios yälguxhtis nurnu, dxejc tednu trabajwduxh, ¿la rujnni latsiaj loonu, ä? (Caniä si'c te bejn guedxliuj naj.)

⁶ ¡Xho gacni si'c! Paru najcni si'c, ¿xho mood gun Dios yälguxhtis loj rebejn guedxliuj?

⁷ Paru redidx-xhii ni rniä riliä'pru xpala'n Dios näjza xtidxliini, ¿xhicuent gunni yälguxhtis narä si'c te ben DOJ?

⁸ Yu'za bejn ni canii didx-xhii, najreni cayäjpnu lo rebejn: “Colyejn cosguijdx te guiluilojni recoshuen.” Per rebejn ni canii si'c sidzujn dxej gacreni yälguxhtis.

Guiraanu najcnu ben DOJ

⁹ ¿Dxejca'? ¿La najcnu benhuenduxhru lojreni, ä? Dini gac; tebloj abile'cnu yälquij xten rexpen Israel con rebejn ni di gac xpen Israel, sa'csi guiraareni yu'reni lo DOJ.

¹⁰ Si'cni caj lo guiitz:

Ruti te be_nsa'c, nicla tejni.

11 Ruti te be_nj_n ni racbee,
ruti chu tej nani rguu_il Dios.

12 Guiragajcreni abirii lo xnejz Dios,
teblojsi xhet sajcdireni.

Ruti chu tej ni rujn cossa'c, nicla tejni.

13 Ro'reni r_ii ganax didxguijdx,
najcni si'c te baa ni naxal,
rusgueerene con lujdxreni,
didxlatsiaj r_ii ro'reni najcni si'c benen_n ni yu' ro' te
ba_nialajz.

14 Ro'reni entis cague,
entis canii didxrdxe'ch lo sa'reni.

15 Ni'reni ruxu_nli saxhe' xtiejn sa'reni.

16 Cadrotis rijreni rujnreni latsiaj,
ruteedreni sa'reni trabajw.

17 Direni gumbee nezyuj ni ruscuexdilajz.

18 Niclaza guidxelojreni Dios.

19 Racheenu najc rediidx nani caj lo xleii Dios
par rebejn ni rnibee leii lojreni, te ji_auu ro' guiralii
rebejn, te guiraa reben_n guedxliuj gacheerene yu'
xtoj_lreni nez loj Dios.

20 Sa'csi mase gusoob bejn guira'ti diidx ni caj lo
leii, di leiiga gudzucaj xtoj_lbejn_{ga}, sa'csi leiiga najc
nani guluii dojl_n ni yu' ne_n lastooni.

Rus_laa Dios lo dojl_n xcuent ya_rlirilajz xtiidxni

21 Na_j ruluii Dios stee mood guibicaj xtoj_lnu,
nani di gac mood ni caj lo xleii toMoisés. Luxh
galooli gusloj canii Dios xcuent nezyujre, cajni lo
reguijtz xten leii na_jza lo reguijtz ni bejn rebejn
nani gunii xtidx Dios galoo.

22 Stee mood najc scree: Chutis ni chalilajz xtidx Jesucrist, sajc naya lastooni nez loj Dios; si'c sajc garaliiza nani salilajz, sa'csi tebloj najcnu nez lojni.

23 Sa'csi guiralii rebejn guedxliuj abanijt lo Dios, direni guiga' guidzujreni lo xnezyuj Dios.

24 Niluxh balaslajz Dios nuunu, banidxxlia'ni loonu yalnabannaya nez loj Dios sa'csi Jesucristis gudijx yalguxhtis xten dojl che baxhe'ni xtiejnni lo cruzj te badzucajni xtojlnu.

25 Baxhal Dios xi'nni, Jesucrist, te cuajni lo cruzj nez loj rebejn te si'c gudijxni guiraa rextojl chutis bejn ni rililajz xtidx Dios xcuent xtiejn Jesucrist. Si'c bejn Dios te guluiini xho guibannaya bejn lojni. Galoo gojptis Dios pasens rebejn, dini niujn yalguxhtis rextojlreni,

26 sa'csi acanajn Dios guc gunni yalguxhtis re-dojlga, te si'c guiluiini xcálnayani nez loj guiraa rebejn, te Diospac gunnaya nez lojni chutis ni rililajz xtidx Jesucrist.

27 Ni'cni ¿con yálnaro? ¿Con yälbindaan? ¡Xhet sajc dini! ¿Xhi leii rudzucaj xtojlnu? ¿La leii najc ni rnii jiennu dzunsa'c, ä? ¡Dini gac si'c! Yu' tejtis leii ni rudzucaj dojl, nani rnii chalilajztis bejn xtidx Jesucrist.

28 Dxejc sajc guiniä lojtu chutis bejn sajc gac naya nez loj Dios sa'csi rililajzni xtidx Jesucrist, xhet sa'csi rujnni redzunsa'c ni caj lo leii.

29 ¿La najc Dios Xtiooztis rexpen Israel, ä? ¿La dini gac näjza Dios xten rebejn ni di gac xpen Israel? ¡Xho dini gac! Najcni Dios xten guurop cuaa bejn.

³⁰ Ruti chu stee Dios, tejtis Dios yu'. Ruslaani lo dojl rebejn ni guyu' bee sa'csi huililajzreni xtiidxni, sigajcza ruslaani lo dojl rebejn ni xhet beedi guyu' sa'csi huililajzreni xtiidxni.

³¹ ¿La rudzucajnu leii sa'csi rililajznu, ä? Ajndi. ¿Xho gacni si'c! Alga basoobnu xtidx leiiga che huililajznu xtidx Jesucrist.

4

Xcälrlilajz toAbram

¹ ¿Xhini'c sajc guiniinu xcuent toxtadgoldoonu, Abram?

² Paru niajc toAbram beñnaya nez loj Dios por redzuun ni bejni, pet sajc guibalazduxhni, per xhet nez lojdi Dios.

³ ¿Xhini'c caj lo xtidx Dios? Caj rediidxre: Huililajz toAbram xtidx Dios, ni'c bachaag Dios cuent najcni te beñnaya nez lojni.

⁴ Meel nani rca' te bejn ni rujn te dzuun, meelga najc ni riäjl xca'ni, xhet rcaxlia'dinini.

⁵ Luxh nani rililajztis xtidx Dios ni ruslaa bejn lo dojl, lacuaa naani yu' xhi dzuun sajc gunni te guibicaj xtojlni, bejnga najc te beñnaya nez loj Dios, sa'csi huililajzni xtiidxni.

⁶ Sigajcza naj toDavid, chicbaa bejn nani ruchaag Dios cuent najcni te beñnaya luxh di niqiiin niujnni redzuun ni caj lo leii. Räjpni:

⁷ Chicbaa renani abaslaa Dios lo xtojlni, renani abiäuu loj xtojlni.

⁸ Chicbaa bejn nani diru Dios gun cuent xtojlni.

⁹ ¿La sajc guiniini chicbaa rebejntis nani guyu' bee, ä? ¿La et näjdiza renani di niu' bee, ä? Sa'csi

rniinu: “ToAbram gujc te beṇnaya nez loj Dios sa'csi huililajzni xtidx Dios.”

¹⁰ Guc bidxaag cuent najcni te beṇnaya nez loj Dios ¿che gajdni chu bee, ä? O ¿Laa che guyu'ni bee? Bidxaagpac xcuentni che gajdni chu bee.

¹¹ Dxejcti guyu'ni bee si'c te seen xten yälṇaya sa'csi huililajzni xtidx Dios che gajdlini chu bee te gacni xtad guiraa renani rililajz laḷ ni xhet beedi yu'reni, te näjza laareni guidxaag cuent najcreni beṇnaya nez loj Dios,

¹² te gaczani xtad guiraa renani yu' bee ni huililajzza xtidx Dios si'c huililajz toAbram cheni gajdni chu bee.

Diidx ni bia'n Dios rsiojb xcuent yälṇrililajz

¹³ Bia'n Dios diidx loj toAbram näjza loj rexagdooni, xca'ni guedxliujre si'c yälṇnasa'c xtenni. Xhet sa'csi gusoobni xtidx leii xca'nini, sica'nini sa'csi najc toAbram te beṇnaya nez loj Dios sa'csi huililajzni xtidx Dios.

¹⁴ Sa'csi paru renani rusoob xtidx leiiga najc nani xca' yälṇnasa'cga, xlia'si chalilajz bejṇ xtidx Jesucrist, luxh xhetza sajcdi diidx nani bia'n Dios loj toAbram.

¹⁵ Che yu' te leii, luxh yu' chu di gusoobni, dxejc rdxe'ch Dios loj bejṇ. Cadro xheti leii, xhetiza xtojḷreni.

¹⁶ Ni'cni balaslajz Dios nuunu, te sudzu'tz diidx ni bia'nni loj toAbram, te guiraa rexagdooni ni rililajz sica' yälṇnasa'c, xhet xtebtis renani sasanäj xleii toMoisés, nägajcza renani rililajz xtidx Dios si'c huililajz toAbram, nani najc xtad guiraanu nani chalilajz xtidx Dios.

¹⁷ Si'cza caj lo xtidx Dios, caj rediidxre: “Abenä gaclu xtad xhidal renación.” Si'c bia'n Dios diidx loj toAbram, Gueb Dios nani gudeed yäl'nabajn loj rebengut, nani rnii xcuent recos nani gajd gac ascanu ala najcni.

¹⁸ Anajn toAbram naganduxh soob diidx ni bia'n Dios con laani, luxh laani empac huililajzni, ni'c gujcni xtad xhidajl nación, te gusojb xtidx Dios ni guniini che räjpni: “Scree gac xhidajl rexag-doolu.”

¹⁹ Di toAbram nunijt xcäl'rililajzni, mase ayu'ni tegayuu ijz, najcni anajcni bengool, luxh sigajcza Sara abengool diru xi'nreni chu.

²⁰ Dini niun-tio'p lajzni xcuent rediidx nani bia'n Dios con laani, alga gusutijpruni huililajzni xtiidxni, gulä'pni xpala'n Dios, badeedni xquixtios lojni.

²¹ Anajcni rajp Dios yäl'rnibee te gunni guiralii nani bia'n diidx gunni.

²² Ni'c bachaag Dios cuent najcni te beñnaya nez lojni sa'csi huililajzni xtidx Dios.

²³ Xhet xtebtisdi xcuent toAbram cuaj rediidxre: “Bidxaag cuent najcni te beñnaya nez loj Dios sa'csi huililajzni xtidx Dios”,

²⁴ näjza xcuentnu cuajni, sa'csi che chalilaaznu xtiidx nani baspañsac Xtad Jesucrist loj rebengut, sidxaag cuent najcnu beñnaya nez loj Dios.

²⁵ Bacuaareni Jesucrist lo crujz te gudijxni rex-tojnu nez loj Dios, luxh gubañsacni lo rebengut, te gac gacnu beñnaya nez loj Dios.

Xhi rsiajc bejn che najcreni bejnaya nez loj Dios

¹ Ni'cni che rililajznu xtidx Dios rudzucaj Jesucrist xtojlnu rajcnu bejnaya nez loj Dios, ni'cni ruscuedxini lajznu.

² Sa'csi gujt Jesucrist, sa'csi gubansacni lo rebengut xcuent nuurnu, che rililajznu xtidx Dios xcuent Jesucrist, rulaslajz Dios nuurnu, ni'cni rbalajznu, rajpnu yalnabajn, su'pacnu lo xcälrdimbicha' Dios.

³ Luxh xhet ni'ctis, sajca guibalaaznu che tednu trabajw, sa'csi najnnu trabajwga sujn jia'pnu pasens.

⁴ Luxh che rajpnu pasens rajcnu te benguyajlr; che anajczanu benguyajl, rililazsa'crunu.

⁵ Luxh yälrlilazsa'cnu dini gusanxtujy, sa'csi yälsanälajz ni rajp Dios ruchaj lastoonu sa'csi nen lastoonu rbäjz Xsprit Dxa xten Dios ni baniidxni loonu.

⁶ La_l ni xhetliidi sajcdi jiennu lagajc xcuentnu te guibicaj xtojlnu, che basa' dxej biääd Jesucrist te gujtni lo cruz xcuent rebendojl.

⁷ Guliipacni, naganduxh guidxälni te bejn ni xcäjb guet lacuaa te bejn ni laaca rujnni. Per sidxajl te bejn ni xcäjb guet lacuaa te be_{nsa}'c.

⁸ Luxh Dios baluiloj xcälrinälajzni xcuent nuurnu sa'csi la_l ni yugajcnu lo dojl, gujt Jesucrist lo cruz xcuentnu.

⁹ Aticaxh naj ni najcnu bejnaya nez loj Dios sa'csi baxhe'ni xtiejnni te gubicaj xtojlnu, naj sidedcaj gacnu xcäl_{gux}htis Dios.

¹⁰ Palga la_l ni rdxe'chnu lo Dios, basiäjlni lajzni xcuentnu sa'csi gujt Xi'nni lo cruz, naj ni abiäj_l

lajzni, suslaani nuure lo dojl sa'csi gubaṅsac Xi'nni loj rebeṅgut.

¹¹ Luxh xhet ni'ctis, sibalaznäjnu Dios xcuent Dad Jesucrist, sa'csi xcuentni ara'pnu yälrbedxi lajzni nez loj Dios.

Adán con Dad Jesucrist

¹² Ni'cni, xcuent tejtis niguii biu' dojl lo guedxliuj, luxh xcuent dojl biädza yälgujt, gudejdti yälgujt loj guiraa rebejn, sa'csi guiraa rebejn bejnreni dojl.

¹³ Cheni gajd xleii toMoisés chu lo guedxliujre, alabejn rebejn dojl, per di niajcdi nucuaquijni rebejn sa'csi xheti leii.

¹⁴ Luxh empac gujt rebejn neṅ redxej ni gubajṅ toAdán hasta redxej ni gubajṅ toMoisés, mase direni niujṅ lagajc dojl nani bejn toAdán; luxh ruluiloj yu' chu stee bejn nungäj jiaäd.

¹⁵ Luxh nani runidx-xlia' Dios dini gac si'c najc xtojṅ toAdán. Dini gac si'c sa'csi palga xcuent dojl ni bejn toAdán, gujt xhidalduxh bejn, cuantimaaz naj sunidx-xlia' Dios yälṅabajṅ par tejpas loonu por xcälṅrulasajz Dios, nägajc por xcälṅrulasajz Dad nani laa Jesucrist.

¹⁶ Luxh nani runidx-xlia' Dios loonu dini gac si'c yälṅrunijt ni biäd loonu xcuent dojl ni bejn toAdán; sa'csi xcuent tejtis dojlga biäd yälṅuxhtis xten Dios, sa'csi guiraliiza rebejn guedxliujre yu' lo dojl, per xcuent nani banidx-xlia' Dios, nala-jznu, gujt Xi'nni Jesucrist lo cruja, ni'c gujc sa'csi yuduxhtej dojl, te xcuent ni bejn Jesucrist sajz gac bejn beṅnaya nez loj Dios.

17 Palga xcuent dojl ni bejn tejsi bejn_{ga} gunibee yälgujt lo guiraa bejn, cuantimaaz lo yäl_{nabajn} par tejpas sinibee guiraa reni rca' xcäl_{rulaslajz} Jesucrist näjza renani rcaxlia' lojni yäl_{racnaya} nez loj Dios.

18 Ni'cni sigajc ni biääd yäl_{guxhtis} lo guiraa reben guedxliuj xcuent dojl ni bejn tejsi niguii, sigajcza sa'csi basoob stee niguii xtidx Dios, xhidäl bejn gujc be_nnaya nez loj Dios, cua'reni yäl_{nabajn} par tejpas.

19 Nalajznu sigajc ni banijt xhidäl_{duxh} bejn nez loj Dios xcuent tej niguii ni di nusoob xtidx Dios, sigajcza xhidäl_{duxh} bejn saj_c be_nnaya nez loj Dios xcuent tej niguii ni basoob xtiidx Dios.

20 Ni'cni badeed Dios xleii toMoisés, te guze_nru dojl. Niluxh cadro guyu_{duxh} dojl, ro'c nanabza chuduxhru xcäl_{rulaslazduxh} Dios,

21 te sigajc ni gunibee dojl guyu' yälgujt, sigajcza gunibeeru xcäl_{rulaslajz} Dios te jia'cnu be_nnaya nez loj Dios, te xca'nu yäl_{nabajn} par tejpas xcuent Xi'nni, Dad Jesucrist.

6

Agujtnu lo dojl per naba_nnäjnu Jesucrist

1 ¿Xhini'c guiniinu, naj? ¿La saj_c guidxunrunu lo dojl te tioobru xcäl_{rulaslajz} Dios, ä?

2 ¡Gurniälojtu gacni si'c! Nuurnu najcnu si'c te be_ngut lo dojl sa'csi rililajznu xtidx Dios; ¿xhoxh gac guibaj_nrunu lo dojl?

3 ¿La ditu gan, che gurobnisnu con laj Jesucrist, najcni si'c ni näjza nuurnu gujtnu si'c ni gujt Jesucrist?

4 Sa'csi che gurobnisnu bigatznäjnuni si'c lo yälgujt, te sigajcni huäjs Jesucrist lo yälgujt xcuent xcälrnibee Dios, sigajcza näj nuurnu sajç guidx-unnu lo te yäl̄nabañcoob.

5 Sa'csi palga gujçnu tejsi con laani lo xcälgujtni che birobnisnu, sigajcza sajçnu tejsi con laani lo yäl̄nabañsac lo rebengut.

6 Ni'cni xcärienbiejwnu cuaj lo crujz con laani, te badzucajni rextojl̄nu, te di gacdiru guinibee dojl̄ loonu.

7 Sa'csi nani agujt, di gacdiru guinibee dojl̄ lojni.

8 Palga nuurnu agujtnu con Jesucrist, rililaaznu sibañsaczanu con laani.

9 Sa'csi nadonpacnu gubañsac Jesucrist loj rebengut, ni'c diruni guet, diru yälgujt ga'p yäl̄rnibee lojni.

10 Che gujt Jesucrist, gujtni xcuent dojl̄, luxh diru gacdi guinibee dojl̄ laani par tejpas; ñaj ni gubañsacni, nabajñni nez loj Dios.

11 Ni'cni la'tu colguchaag cuent najctu si'c te bengut lo dojl̄, luxh nez loj Dios, colguchaag cuent nabaññajtu Jesucrist.

12 Ni'cni na'c gusaantu guinibee dojl̄ tiejxhtu te guntu si'ctis ni rlazj tiejxhtu.

13 Na'cruza gusaantu jiajb guideb lagaa tiejxhtu lo dojl̄ te guntu cosguijdx. Maazru hueen colgudeed tiejxhtu lo Dios si'c te bejn nani gubañsac lo rebengut, näjza colgudeed guideb lagaa tiejxhtu te guntu recoshueen si'c ni rlazj Dios guntu.

14 Sa'csi diru dojl̄ guinibee lojtu, sa'csi dirutu chu loj xleii toMoisés, sa'csi yu'tu lo xcäl̄rulaslazj Dios.

La'tu najç si'c remos

15 ¿Xho gacni naj? ¿La sajc jienrunu dojl naj ni dirunu chu lo leii sa'csi yu'nu lo xcäl_rulaslajz Dios, ä? jXho gacni si'c!

16 La'tu nansa'ctu palga yu'tu si'c te mos loj te lam te gusobdiajgtu xtiidxni, najcpactu xmos bejn nani rusoobtu xtiidxni. Ni'cni, palga gusoobtu xtidx dojl, ni'c najc xlamtu, ni'c siädnä yälgujt lojtu. Palga gusoobtu xtidx Dios, ni'c najc xlamtu. Dxejc sajctu bejnaya nez loj Dios.

17 Xquixtios lo Dios, galoo gujctu xmos dojl, per naj guideb lastootu basobdiajgtu xtidxcoob Dios, huililajztu xtiidxni ni basule'nu lojtu.

18 Luxh agulaatu lo dojl, biädjiajctu xmos Dios lo dzunsa'c.

19 Narä cagusule'ä diidx con sa' didx guyasire sa'csi gajdtu gacbesa'c xho najc xnezyuj Dios. Che gujctu xmos dojl, guideb lagaatu bejntu dojl, bejntu latsiaj, luxh ni'c satajltis latsiaj ni bejntu. Naj ni najctu xmos Dios lo dzunsa'c, guideb lagaatu colyejnru dzunsa'c, te si'c sidajlru dzunsa'c ni guntu sa'csi najctu bejnaya nez loj Dios.

20 Sa'csi che gujctu xmos dojl, di rextidx Dios guinibee la'tu.

21 Naja', ¿xhini'c bejntu gaan che gujctu xmos dojl, bejntu recos ni rtuinäjtu naj? Ni xnezyuj recosga rdzujn loj yälgujttis.

22 Per naj, sa'csi agulaatu lo dojl, abiu'tu najctu xmos Dios, sujntu sajctu bejnaya nez loj Dios, luxh xnezyuj recoscoobre rdzujn lo yäl_nabannäj Dios par tejpas.

23 Xcälrajx xten dojl najc yälgujt, per nani runidx-xlia' Dios najc xcäl_nabannäj Dios par tejpas xcuent ni bejn Jesucrist xtadnu.

7

Yäl_rului ni rudeed yälguch_ñaa

¹ Caniä lojtu ni najn xleii toMoisés. ¿La ditu gan, resa'ä, xleii toMoisés rnibee loj te bejn guideb nabaj_nni lo guedxlijre?

² Najcni si'c te gunaa nani bach_ñaa te niguii. Nanabpac cuäznäjni chäälni guideb nabaj_nni. Si'c rnibee leiiga. Palga guet chäälni, diru gacdi guinibee leiiga lojni xcuent chäälni.

³ Ni'cni, la_l ni nabaj_n chää_l gunaaga, palga cuäznäj gunaaga ste'ca niguii, cayuj_nni dojl_sir-ilajni gunaguijdx. Palga agujt chää_l gunaaga, agulaani lo leiiga, sajc guch_ñaani stee niguii, xhet dojldi cayuj_nni, dizani guirilaj gunaguijdx.

⁴ Ni'cni la'tu, rebetzä, sigajcza agulaatu lo leiiga, sa'csi najcni si'cni gujctu si'c bengut lo leii che gujt Jesucrist lo cruzj, te naj sajc jiu'tu lo ste'ca bejn, loj lagajc Jesucrist nani gubañsac loj rebengut te sajc jiennu redzunsac ni rlazj Dios jiennu.

⁵ Sa'csi la_l ni gubaj_nnu lo yäl_nabañbiejwga, lagajc rediidx nani rnii leiiga di gacdi gun bejn, lagajc recosga rlazj gun tiejxhnu, luxh si'c sozaatisnu lo xnezyuj yälgujt.

⁶ Naj abiriinu lo leiiga, sa'csi agujtnu lo leiiga nani gunibee loonu galoo. Naj con xpريتcoob ni yu'neñ lastoonu yu'nu lo Dios, xhet con xcärienbiejwdi ni gojpnu che nanab gusoobpacnu leii.

Redoj_l nani yu' tiexhä

⁷ ¿Xhixhni'c guiniinu naj? ¿La dojl najc leii, ä? ¿Xho gacni si'c! Palga dina niembeä xhi caj lo leiiga, dizana niacbeä cayunä dojl. Dina niacbeä cayunä dojl che rlazä xca'a xhixten ste'ca bejn

palga dina niolä lo leii rediidxre: “Na'c chuguij lajzlu rehxixten bejn.”

⁸ Ni'cni lagajc diidx ni caj lo leiiga bejn guyuguij lazä rehxixten bejn sa'csi nancheä najcni dojl. Paru xheti leii, xhetiza dojl, agujtni.

⁹ Galoo gubanä xhet leiidi nanä, luxh che biääd diidx ni rnibee leii, gucbeä xhini'c najc dojl, dxejc banitä lo Dios, si'c ni gutä.

¹⁰ Luxh baxhal Dios leiiga loonu te jiuäni, te xca'ä yäl**n**abajn, luxh alga bazenni benä dojl, banitä nez loj Dios, gutäti dxejc.

¹¹ Con leiiga, basguee dojl narä, bejnni narä si'c te beņgut nez loj Dios.

¹² Ni'cni, leii najc dxan, näjza rediidx ni caj lo leiiga najc dxan; hueen najcni, didxgulii najcni.

¹³ ¿Dxejca'? ¿La nani najc te coshueen huinä narä lo yälgujt, ä? ¿Xho gacni si'c! Dojl najc ni huinä narä lo yälgujt. Te si'c xcuent leiiga ni nasa'c, jienlojni dojlpac najc dojl sa'csi bagu'tni narä con te coshueen, te lagajc rediidx ni caj lo leiiga jienloj lacti latsiaj najc dojl.

¹⁴ Sa'csi nadonnu leiiga najc xtidx Dios, luxh narä nacä te beņ guedxliujre, nacä xmospac dojl.

¹⁵ Sa'csi dina gacheä xhini'c runä. Dina gunä recos nani rlazä gunä, alga cayunä latsiaj nani dipacna rlazä gunä.

¹⁶ Naj palga narä runä latsiaj nani dipacna rlazä gunä, lagajcza ni'c ruluii hueenca najc leii.

¹⁷ Naj, diruni gac narä ni cayujn latsiaj, sa'csi yu' dojl neņ lastoä, ni'c ni cayujn runä latsiaj.

¹⁸ Sa'csi narä nanä neņ lastoä, nalajznu lo tiexhä, xhetliidi cossa'cdi yu'; sa'csi rlazä gunä

coſsa'c, per dina gacdipä te gunäpac recossa'cga.

19 Sa'csi dina gunä redzunsac nani rlazä gunä, alga latsiaj nani diru rlazä gunä, ni'c runä.

20 Ni'cni palga runä latsiaj nani diru rlazä gunä, xhet narädi runäni, dojl ni yu' tiexhä, ni'c ni cayujn runä latsiaj.

21 Ni'cni narä, nani rlazä gunä redzunsac, rdxälä leiire: yu'pa dojl tiexhä.

22 Sa'csi neñ lastoä, rlazäpac gusobä diidx xten xleii Dios.

23 Luxh ruhuiä garenca leii yu' guideb lagaa tiexhä, ruchagdijlni leii ni yu' xcärienä, ruteedzani narä ladzñaa xleii dojl nani yu' guideb lagaa tiexhä.

24 ¡Proobza narä! ¿Chuni'c gusläa tiexhä ni nungäj] guet xcuent dojl?

25 ¡Xquixtios loj Dios sa'csi Dad Jesucrist sajc gusläa nuurnu lo dojl! Ni'cni con xcärienä rusobä xtiidx Dios, yu'ä lo xleii Dios, niluxh tiexhä rlajz gusoob xtiidx dojl, chuni lo xleii dojl.

8

Yälñabajn ni najc xcuent Sprit Dxañ xten Dios

1 Ni'cni ñaj rut rajcdi rbe'c xcälquij renani ahuililajz xtidx Jesucrist, renani diru jiu gunreni latsiaj ni rlajz gun tiejxhreni, alga riurureni rujnreni ni rnibee Sprit Dxañ xten Dios ni rbäjz neñ lastooreni.

2 Sa'csi leii xten Sprit Dxañ xten Dios ni rudeed yälñabajn xcuent Jesucrist, abasläani narä lo yälñabee xten xleii dojl näjza yälgujt.

3 Sa'csi nani di niajcdi niujn leibiejw, sa'csi dini niajc nadip lo rebeñguedxliuj te gacreni beñnaya

nez loj Dios, ni'c bejn Dios che baxhalni Xi'nni Jesucrist, si'c te beñ guedxliujre xcuent dojl, te bejn ni yälguxhtis lo dojl ni rnibee tiejxh bejn.

⁴ Te si'c gac xcälguxhtis xten leibiejw lo tiejxh nuurnu, renani dirunu gusoob nani rlanj gun tiejxhnu, sa'csi naj rbajnnu si'c ni rnibee Sprit Dxi xten Dios ni yu' neñ lastoonu.

⁵ Sa'csi renani rusoohtis nani rlanj gun tiejxhreni, rujntisreni xhigab xcuent redojlga, luxh renani rusooob xtidx Sprit Dxi xten Dios rujntisreni xhigab xcuent nani rlanj Dios gunreni.

⁶ Sa'csi renani yu'tis yejcreni nani rlanj gun tiejxhreni, sejtreni, sinijtreni; luxh renani yu'tis yejcreni nani rni Sprit Dxi Dios, reni'c sibecdxi lajzreni, sica'reni yälnabajn lo Dios par tejpas.

⁷ Te xcäriejn nani riutis ni rlanj gun tiejxh bejn rdxe'ch Dios lojni sa'csi dini gusoob xleii Dios, luxh nicla gac gunnini.

⁸ Renani nabajntis te gunreni latsiaj ni rlanj gun tiejxhreni di Dios guibalaznäjreni.

⁹ Luxh la'tu dirutu gun si'ctis ni rlanj gun tiejxhtu, ni'cni rujntu si'c ni rlanj Sprit Dxi xten Dios guntu, palga rbäjzni neñ lastootu. Palga yu' chu tejtü ni di Sprit Dxi cuääz neñ lastooni, di ni'c gac xpejn ni.

¹⁰ Palga rbäjz Jesucrist neñ lastootu, agujt tiejxhtu xcuent dojl, xpirttu nabajn sa'csi anajctu beñnaya nez loj Dios.

¹¹ Luxh palga neñ lastootu rbäjz Sprit xten nani baspañsac Jesucrist loj rebengut, lagajc nani baspañsac Jesucrist lo rebengut suspañsac tiexhnu ni nabajn lo guedxliujre xcuent Xpirtni nani yu' neñ

lastoonu.

¹² Ni'cni rebetzä, najcnu bejn ni cuaj di'n, xhet lojdi tiexhnu te jiennu si'c ni rlanj gun tiexhnu.

¹³ Sa'csi palga cayujntu si'c ni rlanjtis gun tiejxhtu, sejtpactu. Palga nabajntu xcuent Sprit Dxi xten Dios ni rbäjz nen lastootu, sibälaztu latsiaj ni rlanj gun tiejxhtu, sibannäjtu Dios par tejpas.

¹⁴ Sa'csi guiraa renani rului Sprit Dxi xten Dios guiraa reni'c najc rexi'n Dios.

¹⁵ Naj ditu nica' te sprit xten te mos te chusactu lo yärdxejb, alga cua'tu sprit xten ni najc si'c te bisäjb ni cua' bejn si'c xi'npacni, naj najcnu xi'nni, ni'cni sajc gäbnu lojni: "Guejblu, Xtadä."

¹⁶ Sa'csi lagajc Sprit Dxi xten Dios rului loj xpriinu, najcpacnu xi'n Dios.

¹⁷ Luxh palga najcnu rexi'nni, sica'zanu yäl_nasa'c lo Dios, tejsi yäl_nasa'c con Dad Jesucrist, palga guliini tednu lagajc trabajw ni gudejndi xcuent xtiidxi, te tejsiza siliä'p xpala'nnu con laani.

¹⁸ Sa'csi narä runä xhigab retrabajw ni cadejdnu nen redxejre, digacdi gun tebloonureni con yälrdimbicha' nani churu guihuinu.

¹⁹ Sa'csi guiraa recos nani benchee Dios lo guedxliujre, cabäjzreni, yuduxhreni gaan fiireni dxej che gululoj Dios chuni'c najc rexi'nni.

²⁰ Guiraa recos ni gulecxtiej Dios lo guedxliujre, xlia'si gujcreni, xhet sa'csi si'c rlanjdi recosga, per sa'csi si'c bejn Dios, ni cabäjztis

²¹ guslaapacni guiraa recos ni bencheeni lo guedxliujre lo xcälrnibee yälgujt, yälrnitloj, te dx-ejc sajc jiu'ni lo yälrbedxi xten xcälrdimbicha' xten rexi'n Dios.

²² Guiraa recos ni gulecxtiej Dios lo guedxliujre entis roonreni, guira dxej rdejdreni trabajw, si'c rdejd te gunaa trabajw che rajl xi'nni.

²³ Luxh xhet nani tre'tis lo guedxliujdi, näjza nuunu ni yu' Sprit Dxi xten Dios nen lastoonu, roonzanu cabääznu dxej cheni xca' Dios nuure si'c rexi'nni, cheni guscoobzani tiexhnu.

²⁴ Sa'csi xcälirililaaznu ni rbääznu, ni'c bejn gulaanu luxh yälrbäjz ni guyasi rien, di ni'c gac yälrbäjz, sa'csi çchu laa ni cuääz xcuent te cos ni ala bahuiini?

²⁵ Palga cabääznu xcuent te cos ni gajdnu guihui, rbaali laaznu, rsiudzu'tznu rbäjznu guihuiinu gacni.

²⁶ Sigajcza racnäj Sprit Dxi xten Dios nuure cadre xheti yälrutijp laaznu sa'csi nicla guidonnu xho mood riäjł guiniab bejn lo Dios. Luxh lagajc Sprit Dxi ni yu' lastoonu rniabni lo Dios xcuent nuure con yälrbedxnen nani nicla gajd bejn gäb con diidx xho najcni.

²⁷ Dios, nani rula'tz lastoonu, nanchee xhini'c rniab Sprit Dxi xteni xcuent nuurnu, sa'csi rniabni si'cpac ni rlajz Dios guiniabnu xcuent rexpejpac Dios.

Siennu gaanpac loj guira'ti

²⁸ Nadoncheenu guira'ti ni rsiajc rebejn ni sanälajz Dios, reni agule Dios te gunreni xtzunni rsiajcrenini te gun Dios gac recosga par xcäl'nasa'creni.

²⁹ Sa'csi renani biembee Dios galooli, reni'c gule Dios cheni gajdli guirixtiej guedxliujre, te gacreni

si'c ni najc Xi'nni; te gacza Xi'nni ganid loj guiraa ni najc famil xten Dios.

³⁰ Renani guleni galooli, reni'c gurejdxni; renani gurejdxni, bejnzani najcreni be_nnaya nez loj Dios; renani bejn_ni najcreni be_nnaya nez loj Dios, gulä'p_zani xpala'nreni.

³¹ ¿Xhixhni'c guiniinu xcuent dee? Palga yu' Dios xlaadnu, ¿chuxh ni'c najc ni gun gaan loonu?

³² Dios nani di nudxojn Xi'nni, nani cuäjb cuaj Xi'nni lo cruzj te gujt_ni, te gudijxni xcuent xtoj_lnu, ¿xho dini guniidx loonu xcuent Xi'nni guira'ti nani rqui_nnu, ä?

³³ ¿Chuni'c sajc cue'c xhi xcälquij reni agule Dios nez lo Dios, ä? Ni lagajc Dios najc nani rni_i najcnu be_nnaya nez lojni.

³⁴ ¿Chuni'c najc nani cue'c xhi xcälquijnu nez lo Dios? Jesucrist najc nani gujt por nuure, luxh et ni'tis. Laani gubansaczani loj rebe_ngajt, luxh naj sobga'ni xladbee Dios cadre rnibeeni; laazani cabejdx canabni lo Dios xcuentnu.

³⁵ ¿Chuni'c sajc gudzucaj nuurnu lo yäl_sanälajz xten Jesucrist: trabajw, o yäl_xliajs, o yäl_rusacsí, o yäl_rliaan, o yäl_xhabääl, o yäl_rdxejb, o te spaad, ä? Nicla tejni.

³⁶ Si'c ni caj lo guijt_z ni caj xtidx Dios:

Xcuentlu, sa'csi najcnu xpej_nlu caye'tnu guixe-guixee.

Ruchaagreni cuent najcnu si'c xiil ni aguro' te ju't bej_nni.

³⁷ Luxh loj guiraa recosre, sujnpacnu gaan xcuent nani sanälajz nuure, sa'csi sacnäjpacni nuure.

³⁸ Sa'csi anancheä nicla yälgujt, niclza yäl**n**abaj**n**, nicla rexangl Dios, niclaza renani rnibee, nicla recos ni yu' naj, niclaza recos nani churu gac, niclaza yäl**m**ilaagwr,

³⁹ nicla jiaroduxh, niclaza j**i**äjtpac, niclaza xhitis cos ni guc-chee, nicla tej redee di gacdi gudzucaj nuurnu lo xcäl**s**anälajz Dios, yäl**s**anälajz ni rajpza Dad, Jesucrist.

9

Dios agule reben Israel

¹ Caniä didxguliipac lojtu sa'csi rililazä xtidx Jesucrist. Dina guiniä didx-xhii. Sprit Dxan xten Dios caguluii xcärienä laaca rniä;

² cayac-huinduxh lastoä, sanuutis yäl**x**liajsga.

³ Sa'csi narä rlazä malaii sajc lagajc narä nitloä lo Dios te sajc gacnää resa'ä lo guedxliujre, rexpej**n** Israel.

⁴ Sa'csi laareni najc xagdoo toIsrael, luxh laareni nungäjl gacreni si'c xi'npac Dios. Gubannäj Diosreni. Bia'n Dios didx con laareni. Basa'n Dios xleii Moisés lojreni. Bazuxhijbreni nez lo Dios ne**n** guidoo. Sica'reni reyäl**n**asa'c xten Dios palga jiureni xtiidxni.

⁵ Laareni najc rexagdoo xten toxtadgoldoonu ni gubaj**n** agujc xhero. Jesucrist gujca xagdoo xten toIsrael che gojlni si'c te be**n** guedxliuj. Laani najczani Dios loj guiraanu. Suchä'p xpala'nni par tejpas. Sugacni si'c.

⁶ Luxh dini gac si'cni abanijt xtidx Dios nani bia'nni loj toIsrael. Sa'csi xhet guiraadi rebej**n** ni najc xagdoo toIsrael najc xpej**n**pac Israel.

⁷ Diza guiraa reni najc rexagdoo toAbram gac xi'nguliipacni sa'csi räjp Dios lo toAbram: “Rexag-dodoolu nani guigab najc reni gac xagdoo Isaac.”

⁸ Ni'cni xhet guiraadi rexagdoo toAbram najc rexi'n Dios, xtebtis renani chalilajz xtiidxni, reni'c najc xi'nni.

⁹ Sa'csi bia'n Dios diidx loj toAbram: “Stebijz, lagajc bäiire guibisacä, te dxejc chu te xi'n Sara.”

¹⁰ Xhet diidxtisga gunii Dios. Guniizani lo toRebeca, che nuxi'nni cua'ch, xi'n chäälni, toxtad-goolnu Isaac.

¹¹ Ni'cni ansde gaal rexi'nni, ansde niujnreni te dzunsa'c o te dzunguijdx, te soobpac xtidx Dios xcuent chuni'c cueni lo guiro'p rebäzre, xhet sa'csi bejndireni dzunsa'c, per sa'csi agule Diosni,

¹² ni'c räjp Dios lo toRebeca: “Xingangaloolu gac xmos xinhuinlu.”

¹³ Si'cza caj lo guijtzt rediidxre: “Sanälazä Jacob, niluxh bidxechaä Esaú.”

¹⁴ ¿Xhini'c guiniinu naj? ¿Xhet laadi rujn Dios, ä? ¿Xho gacni si'c!

¹⁵ Sa'csi räjp Dios loj toMoisés: “Sulaslazä chutis bejn nani rlazä gulaslazä, sacnäã chutis bejn nani rlazä gacnäã.”

¹⁶ Ni'cni dini gac xcuent ni rlazj rebejn gac, dizani gac xcuent nani rujn rebejn. Rajctisni si'c rlazj Dios nani rulaslazj bejn.

¹⁷ Ni'cni caj lo guijtzt xten Dios che gunii Dios xcuent Faraón: “Narä benä gujclu reii xten Egipto te guluiloj xcälrnibeä, te guiliä'p bejn xpala'nä guideb guedxliujre.”

¹⁸ Rulaslazjni rebejn nani rlazjtisni, runnadipzani lastoo bejn nani rlazjtisni.

19 Naj la'tu siniitu loä: “¿Xhicuent rucuaquijni bejn? ¿Chuni'c sajc sudzu'tz nez loj nani rlajzni gac, ä?”

20 ¿Chuxh luj, ben guedxliuj, te jieinäjlu Dios? Xhixh säjb te gues loj nani bencheeni: “¿Xhicuent bejnlu narä scree?”

21 Gurniälojlu. Bejn nani runchee guejs, ¿la di gacdi gunni si'ctisni rlajzni con bajnga, ä? ¿La di gacdi guncheeni te guesa'c nägajcza te guesyuj ni xhet sirbdi con lagajc bajnga?

22 ¿Xhiru najc, palga Dios rlajzni guluilojni xho rujnni yälguxhtis, näjza rlajzni guluilojni xcälrnibeeni, gopnäjni pasens renani nungäjl gac yälguxhtis, te nitlojzareni, ä?

23 Bejnni si'c te guluilojni lacti sajc xcälrdimbicha'ni loj renani galooli guleni chú lojni lo xcälrdimbicha'ni.

24 Lagajc nuurnu najcnu reni aguleni; xhet xtebtis loj rexpen Israel guleni nuurnu, näjza loj rebejn ni di gac rexpen Israel guleni nuurnu.

25 Cajza lo guiitz ni bacuaa Oseas:
Renani di gac xpenä, reni'c cuälaä “xpenä”.
Luxh nani dina ninälazä, sinälazäni.

26 Dxejcti lagajc cadre räjpreni lojreni:
“Ditu gac rexpenä”,
lagajc ro'c säjpreni lojreni:

“La'tu najctu xi'n Dios ni nabajn par tejpas.”

27 Cajza lo guiitz ni bacuaa Isaías: “Mase najc xhidajl rexpen Israel si'c najc yujxh ni tre' ro' nisdoo, guxii gac reni laa lo dojl.

28 Sa'csi susoobpac Dad, Dios xtiidxni xcuent xcälguxhtis reben guedxliuj, luxh siojbza gunnini.”

29 Guniiza Isaías, xcuent nani churu gac, bacuaani:

Palga di Dios ni yu' xhaguibaa nusa'n gaii xagdo
 reben tiemp,
 niajcnu si'c gujc Sodoma näjza Gomorra, reguejdx
 ni gunitloj.

Xtidx Dios näj rexpē Israel

³⁰ ¿Xhini'c sajc guiniinu naj? Rebejn nani di gac
 xpen Israel, direni niguiil xho gacreni beṇnaya
 nez loj Dios, niluxh agujcreni beṇnaya nez loj Dios
 sa'csi huililajzreni xtidx Jesucrist.

³¹ Luxh rexpē Israel, mase sanuutisreni lo xleii
 Moisés ni ruluii xho gac bejn beṇnaya nez loj Dios,
 banijtreni, direni niujn gaan nusoobreni guideb
 leiiga.

³² ¿Xhicuent gujcnu si'c? Sa'csi direni nililajz
 xtidx Dios, alga rlajzreni guntisreni dzuun xten
 leii, naareni si'c gacreni beṇnaya nez lo Dios. Ni'cni
 gulaj ni'reni lo guij ni rutienta' bejn, nalajznu
 direni nililajz xtidx Dios xcuent Jesucrist.

³³ Si'cza bacuaa Isaías, räjpni:
 Aguleä te bejn lo guedx Siön ni gac si'c te guij cadre
 rtiäjl ni' bejn,
 te guij ni rusälta' bejn.
 Chutis tej nani chalilajz xtiidxni, dini jianxtujy.

10

¹ Rebetzä, rlazduxhä chalilajz rexpēnä xtidx
 Dios. Rniabduxhä lo Dios te guslaanireni lo
 xtojlneni.

² Narä rniäpac nancheä ruzuxhijb rexpē Israel
 lo Dios, niluxh direni gumbesa'c xhini'c rlajz Dios
 gunreni.

³ Sa'csi direni niacbee xcuent xho rajc te bejn te bejnaya nez loj Dios, ni'c rlajzreni gunreni dzuun si'c ni caj lo leii te gacreni bejnaya nez loj Dios, ni'cza direni nusoob xtidx Dios te gacreni bejnaya nez lojni.

⁴ Abasoob Jesucrist xtidx Leii, ni'cni che chalilajz bejn xtidx Jesucrist, anajcreni bejnaya nez loj Dios.

⁵ ToMoisés bacuaa rediidxre: “Chutis ni rlajz gac bejnaya nez loj Dios sa'csi rusoobni xtidx leii, nanab gusobsa'cpacni diidxga guideb nabajjni lo guedxliujre.”

⁶ Xcäl_nayareni nez loj Dios sa'csi rililajzreni xtidx Jesucrist, rni scree: “Na'c guiniitu neñ lastootu, ¿chuni'c chä'p xhaguibaa?” nalajznu, te jiäd_näsacni Jesucrist loj guedxliuj.

⁷ Na'cza gäbni: “¿Chuni'c jiäjt gabijl?” (nalajznu te chaxiini Jesucrist loj rebeñgut).

⁸ ¿Xhini'c rniini naj? Rniini: “Diidxga suga' gajxh ro'tu, neñ lastootu.” Nalajznu, diidx xcuent yäl_rililaaz nani cagusule'nu lojtu.

⁹ Rniinu lojtu, palga guiniitu con ro'tu, Jesucrist najc Dad loonu, palga chalilajztu baspañsac Dios Jesucrist loj rebeñgut, sus_laani la'tu lo dojl.

¹⁰ Sa'csi con lastooni rililajz biniet xtiidxni, ni'c rajcni bejnaya nez loj Dios; luxh che rcäjpza biniet con ro'ni, Jesucrist rnibee loonu, rus_laa Diosni lo dojl.

¹¹ Sa'csi rni xtidx Dios scree: “Chutis ni rililajz xtidx Dad Jesucrist, dini jianxtujy.”

¹² Sa'csi guiraa rebejn najc tebloj nez lojni, rex-pejn Israel sigajc rebenzijt, sa'csi lagajc laani na-

jçni Dad lo guiraareni, rulaslazduxhni guiraa renani rbedx-rniab lojni.

¹³ Lo xtidx Dios caj rediidxre: “Chutis ni rbedx-rniab lo Dad, siliaani lo xtojlni palga rililajzni xtidx Dios.”

¹⁴ ¿Xho gac guiniabreni lo Dad, palga direni chalilajz xtiidxni? ¿Xho gacza chalilajzreni xtiidxni, palga gajd diajgreni jiejn xtiidxni? ¿Luxh xho jiejn diajgreni xtiidxni palga rut rusule'di diidxga lojreni, ä?

¹⁵ Luxh ¿xhoza gusule'reni diidxga palga rut guxhaldireni? Si'cni caj lo guijt: “Chipza saru najc ni' renani riädnä diidx xcuent cossa'c, yärbecdx lajz rebejn.”

¹⁶ Xhet guiraadireni rusoob xtiidxni, sa'csi guniiza toIsaías: “Dad, ¿chuni'c chalilajz xtiidxnu?”

¹⁷ Rililajz bejn xtidx Dios che rucuadaiajgreni didxga; rucuadaiajzarenì che yu' chu rusule' xtidx Jesucrist.

¹⁸ Naj arniä: Gajdpac diajgreni jiejn xtiidxni, o ¿la babiejn diajgreni, ä? Pues abiejn diajgreni, sa'csi lo xtidx Dios caj scree:

Abire'ch xse'reni guideb guedxliuj,
abidzujnza rextiidxreni lo guiraa reguejdx ni tre'
lo guedxliujre.

¹⁹ Rniäza: Dipac rexpen Israel niacbee, o ¿la gucbeereni, ä? Galooli gunii toMoisés rediidxre: Sunä gudxoju tu xcuent rebejn ni di gac te guejdx, con te guejdx nani di gacbee suche'chä la'tu.

²⁰ Diza toIsaías nidxejb guniini rediidxre: Renani di niguiil narä, bidxäjlnarä, baluiloäza loj renani di niniabdiidx narä.

²¹ Guniiza toIsaías xcuent rexpen Israel:

Desde galooli, dxej-yääl basgaä ñää lo rebejn̄ga te niureni xtidxä,
luxh najcreni bejn̄ ni di gusoob diidx, rutzu'reni didxnaj.

11

Rexpen̄ Israel nani gulaa lo dojl

¹ Arniä: ¿La agulälaz Dios rexpen̄ Israel, ä? ¡Xho gacni si'c! Ni lagajc narä nacä te xpen̄ Israel, te xagdoö toAbram, nadxagä lo resa' toBenjamín.

² Di Dios nibälaz rexpejn̄ni, xpen̄ Israel nani guleni galooli che gajdli guirixtiej guedxliuj. O ¿la dilu gacbee xhi caj lo xtidx Dios cadre rni xcuent Elías, xho gunabduxh Elías didxnaj lo Dios xcuent rexpen̄ Israel, ä? Räjpn̄i scree:

³ “Dad, abagu'treni guiraa reniguii nani gunii xtiidxlu, abatzujl̄reni rexquidoolu, xtebtis narä bia'nä, luxh naj rlanjzreni ju'treni narä.”

⁴ Luxh, ¿xhini'c räjpn̄ Dios lojni? Räjpn̄i: “Abalucheä gajdz mił bejn̄ nani gajd guzuxhijb nez loj Baal.”

⁵ Si'cza naj, abia'n te chinae' rexpen̄ Israel nani agule Dios xcuent xcäl̄rulaslajzni.

⁶ Dxejc palga ruslaani nuure lo dojl̄ xcuent xcäl̄rulaslajzni diruni gac sa'csi yu' xhi dzuun biennu te nuslaani nuure lo dojl̄. Paru si'c najcni diru xcäl̄rulaslajz Dios gac yäl̄rulaslajz.

⁷ ¿Dxejca'? Di rexpen̄ Israel nidxäl̄ nani cagui-ilreni, luxh rebejn̄ nani agule Dios, ni'c bidxäl̄ni, luxh ste cuaareni, aguyalajzreni.

⁸ Gujcn̄i si'c caj lo xtidx Dios:
Bascäy Dios xcäriejn̄reni, näjza balojni di jien̄,

lo dxe najli di diajgreni jiejn.

⁹ Guniiza toDavid, scree caj lo xtidx Dios:

Sugun xmex lanijreni jiajbreni,

te gac guiga'reni,

sugacni si'c guij ni rulani' bejn, te gacreni
yälguختis.

¹⁰ Suguscäy Dios balojreni te na'c fisa'creni,

sujie't dejtzeneni, sutedreni trabajwduxh par tej-
pas.

Yälrusläa lo dojl xten bejn ni di gac xpen Israel

¹¹ Naj rniabdidxä: ¿La biajb rexpén Israel te gunijtreni par tejpas, ä? ¿Xho gacni si'c! Sa'csi biajb rexpén Israel, ni'cni gojl biääd yälrusläa lo dojl lo bejn ni di gac xpen Israel, te si'c guisiäblajz lajz rexpén Israel laareni lo dojl.

¹² Palga xcuent dojl ni bejn xpen Israel gojp reben guedxliuj xcäl'nasa'c Dios, palga xcuent yälrunijt xten rexpén Israel guyu' xcäl'nasa'c Dios par rebejn ni di gac xpen Israel, aticaxh chu xcäl'nasa'creni che gusoob xpen Israel xtidx Dios.

¹³ Naj caniä lojtu ni najc bejn ni di gac xpejn Israel. Gule Dios narä te gusule'ä xtiidxni lojtu, ni'cni caläpä xpala'n xtzunä,

¹⁴ te don xho gunä te guisiäblajz reben ladxä ni najc xpen Israel, te si'c chalilajzreni xtidx Jesucrist.

¹⁵ Palga gulecdxireni lajz reben guedxliuj con Dios sa'csi gulälaz rexpén Israel xtidx Jesucrist, aticaxh che chalilajz rexpén Israel rextidx Jesucrist, sibañsac renani najc si'c beñgut.

16 Palga tla' cojb najc hueen, guideb cojbga najc hueen. Sigajcza najc te yajg; palga xlobaani najc hueen, guidebni najc hueen.

17 Rexpen Israel najcreni si'c te yajg oliib; palga gutiuugreni te naa yajgga, dxejc ro'c guquiidreni naa ste'ca yajg te guibajni con xtiejn yajg oliibga.

18 Ni'cni, na'c gactu gualajz lo renaapac yajgga. Colgusnaj lajztu, xhet la'ditu ni rudeed yalnabajn lo xlobaa yajgga, lobaaga ni runiidx yalnabajn lojtu.

19 Dxejc colguinii: “Batiuugreni naapac yajgre, te gujc biguidä cuä' yajgga.”

20 Guliipacni, biru' naapac yajgga sa'csi direni nililajz xtidx Dios luxh la'tu biguiidtu cuä' yajgga sa'csi huililajztu xtiidxni. Na'c gactu gualajz, colguidxejb,

21 sa'csi palga di Dios nutedbia renaa yajgga, diza Dios gutedbia la'tu.

22 Bahuii j lacti hueen najc Dios! Luxh lacti niälajzzani; con renani banijt najcni niälajz, luxh lacti rulasajz Dios la'tu palga chanuu jiutu xtiidxni. Palga ditu jiu xtiidxni, näjza la'tu sudzucaj Dios.

23 Luxh sigajcza reni bidin, palga di chanuu cuälazreni xtiidxni sajz suquidsac Diosreni lo yajgga.

24 Luxh la'tu najctu benzijt, najctu si'c naa te yagoliib ni xtebca gulejn nen dajn. Luxh batiuugni la'tu te baquiidni la'tu lo te yagoliib ni najc yagsa'c ni rcaduxh oliib lojni, mase xhet si'cti najc olibguijxhga, jaticaxh rexpen Israel ni banijt najc si'c naapac xten yagolibsa'cga ni bidin, palga chalilajzpacreni xtidx Dios, suquidsac Diosreni loj yajg ni najc xtenpacreni!

Che laapac rexpən Israel lo dojl

²⁵ Rebetzä, rlazä gacheetu xcuent te diidx nagajn, te di naatu nanduxhtu. Dee najc didx nagajnga: yu' rexpejn Israel ni guc najd lastooreni te direni nililajz xtidx Dios, hasta guisa' redxej ni chalilajz rebenzijt xtidx Dios.

²⁶ Dxejcti siliaapac guiraa rexpən Israel lo dojl che chalilajzreni xtidx Dios, sa'csi si'c caj lo xtidx Dios, cadre caj rediidxre:

Nani ruslaa sajc beņ guedx Sión,
luxh sudzucajni xtojļ renani najc xagdoō toJa-
coob.

²⁷ Dee najc diidx ni bia'nä con laareni,
che gudzucaä xtojļreni.

²⁸ Naj, najczeni xcontraar Dios sa'csi rdxe'chreni xcuent xtidx Jesucrist, te chalilajztu; niluxh Dios sanälajzreni sa'csi si'c abia'nni diidx con retoxtadgoolooreni.

²⁹ Sa'csi rut rajcđi rudzucaj nicla yäl_nasa'c ni rudeed Dios, niclaza yäl_rbejdx xten Dios.

³⁰ La'tu galoo ditu nusoob xitdx Dios. Naj rulaslajz Dios la'tu sa'csi gulälaz rexpən Israel xti-idxni.

³¹ Sigajcza naj direni gusoob xtidx Dios, niluxh si'c najcni te gulaslajz Diosreni sa'csi balaslajzzani la'tu.

³² Dios basaan biajb guiraanu lo dojl, te si'c sajc gulaslajz Dios guiraanu.

³³ ¡Lacti guroob najc yäl_nasa'c xten xcäl_najn, xcäl_racbee xten Dios! Nicla tej beņ guedxliuj di gacbee guiraa rexcäl_guxhtisni, rudliidiza najn rexnezyujni.

34 Si'c caj lo guijt: “¿Chuni'c gucbee xcäriejn Dios? ¿Chuni'cza abaluini? Rutliidi.

35 O ¿chuni'c badedxgaa te xhi cos lojni, te quixsacnini lojni, ä? Rutliidi.”

36 Sa'csi loj Dios siääd guira'ti, luxh laani bencheeni guira'ti par lagajcza laani. Suguiliä'pnu xpala'nni par tejpas. Sugacni si'c.

12

Yälñabajñ rliä'p xpala'n Dios

1 Ni'cni rulidxä la'tu rebetzä, sa'csi rulaslajz Dios nuure, colgudeed xcälñabajñtu lo Dios te gac guibañsa'ctu si'cni rlajz Dios. Dee najc yälrajñpac Dios si'c ni nungäjñ gantü Dios.

2 Na'c rujntu lagajc xhigab ni rujñ reben guedxliuj, colguscoob rexhigabtu te guidxaapac xmoodtu te si'c guluii Dios xhini'c rlajzni guntu, nalajznu xhini'c najc hueen, xhini'c rdxagljajz Dios, xhini'cza najc laapac.

3 Sa'csi balaslajz Dios narä, ni'c rusule'ä xtiidxni loj tejgatu, rniä lojtu, na'c guiliä'ptu lagajc xpala'ntu, naatu sajcrutu loj sa'tu. Colyejn xhigabsa'c, te laaca gac xhigabtu, si'cni baniidx Dios lo tejgatu xho chalilajztu xtiidxni.

4 Sa'csi sigajc najc tiejxhnu, yu' xhidal la'ni, luxh tejgareni rujñ xtzuun-xtzuunreni,

5 sigajcza nuure nani rililajz xtidx Jesucrist, najcnu xhidajñ, najcnu si'c tejsi tiejxh lo Jesucrist, mase tejganu rujñ xtzun-xtzuunnu, tejsi najcnu.

6 Luxh sa'csi tejganu rajpnu garen-garen dzuun xcuent yälñulaslajz ni baniidx Dios loonu, sujiennu

rextzuunnu screeza: nani rajc rnii xtidx Jesucrist, suguiniinini, si'c ni najc xcärlirilajzni;

⁷ nani rajc racnäjä sa'ni, sugacnäjni; nani rajc ruluu xtidx Dios, suguluuini;

⁸ nani rajc gulijdx resa'ni, sugulijdxnireni, nani rajc rudedxlia' xhixtenni lo sa'ni, saru sugudeedni xhixtenni; nani rajc rnibee lo sa'ni, suguinibeeni con yälñadolajz; nani rajc rulaslajz resa'ni, sugulaslajzni con yälñbalajz.

Xho nanab guibañnu lo xnezyuj Dios

⁹ Colchanälajzpac resa'tu, na'c gunsitu si'cni rinälajztureni. Colcuälaz redzunguijdx, colyejntis redzunsac.

¹⁰ Colchanälajz resa'tu si'c rinälajz bejn rebejtzni. Colguiliä'p xpala'nreni.

¹¹ Colyejn dzunsac, na'c cuedxitu. Colyejn xtzun Jesucrist con guideb xtijptu, guideb xcäriejntu.

¹² Colguibalajz sa'csi ahuililajztu xtiidxni. Colcuedxi lajztu che tedtu trabajw. Colcuedx-colnabtis lo Dios guideb nabajntu.

¹³ Colgacnäjä rebejn nani rililajz xtidx Dios; sacru colñii loj ni riädhuiitu.

¹⁴ Colguinii didxsa'c xcuent renani rusacsí la'tu, na'c gudzubdetureni.

¹⁵ Colguibalaznäjä renani rbalajz, colyonnäjä renani roon.

¹⁶ Colyejn tejtis xhigab con resa'tu, na'c gactu gualajz, colguchaag loj rebenñadolajz. Na'c guchalotu najctu beññanduxh.

¹⁷ Na'c gudzu'tu dzunguijdx loj renani rujñ dzunguijdx lojtu. Colyejn recossa'c nez loj guirasi bejn.

18 Cadrotis sajcnì, dxitis colguiba_nnäj guiraa re-bejn.

19 Rebetzä, na'c guntu xhigab lagajc la'tu gudeedu xten renani rujn dojl lojtu, sa'csi lagajc Dios gun yälguxhtis lojreni, ni'cni caj lo xquijtzni scree: “Narä gunä yälguxhtis, narä quixä lojreni si'c naj Dad, Dios.”

20 Näjza: “Palga calaan nani rdxe'ch lojtu, colgudeed xhi gauni, palga cayojlni, colgudeedza xhi yäni, te si'c jianxtiujni.”

21 Na'c gusaantu gun redzunguijdx gaan lojtu, colyejn gaan lo dzunguijdx con recossa'c ni rujntu.

13

1 Guiraatu nanab jiu_tu xtidx renani rnibee lojtu. Sa'csi xheti te yäl_rrnibee nani di Dios nudeed, luxh guiraa reyäl_rrnibee ni yu' lo guedxliujre, lagajc Dios gule'creni.

2 Ni'cni renani di gusoob xtidx renani rnibee, xtidx Dios cabälazni. Luxh renani rujn si'c, lagajc laareni xcaquijreni dojl, sujn Dios yälguxhtis lojreni.

3 Renani rnibee di guchejb renani riu xtiidxreni, ruchejbreni renani najc be_n guijdx ni di jiu xtiidxreni. Palga di rlajztu guidxejb_tu reguxhtis, bejntis dzunsa'c, dxejcti guiliä'preni xpala'ntu sa'csi rujntu dzunsa'c.

4 Reguxhtis rujnreni lojtu xtzuun Dios te guiba_nsa'ctu. Palga guntu dzunguijdx, colguidxejb, xhet xlia'di ca'ni spaad, sa'csi najcreni nani rujn xtzuun Dios te gunreni yälguxhtis, te quixpac renani rujn dojl.

5 Ni'cni nanab jiutu rextiidxreni, xhet ganaxtis sa'csi rujnreni yālguxhtis lojtu, nājza te ga'ptu te xcāriejnsa'c, te xcāriennaya.

6 Ni'cni colquijx lojreni nani riājł xca'reni sa'csi renani rnibee najc xmos Dios, luxh ni'cpac najc xtzuunreni.

7 Colgudeed lo guiraa bejn nani riājł xca'reni. Colquix loj renani nazääbtu; colquijx impuest loj ni riājł xca'ni; colchanälajz renani riājł chanälajztu; colguiliä'p xpala'n renani riājł chä'p xpala'reni.

8 Na'c xcajlu di'n loj nicla tej bejn, di'ntis xten yälrinälajz sa'ni, sa'csi nani rinälajz xpisinni, bejn ga abasooob xleii Dios.

9 Sa'csi lo xleii Dios caj scree: “Na'c guesnäjlü bejn ni di gac chäällu, na'c ju'tlu, na'c cuanlu, na'c gusgueelu, na'c chuguij lajzlu xhixten resa'lu.” Luxh palga yu' xhi stee leii rsa'ni con leii ni rnii: “Chanälajzlu resa'lu si'c sanälajzlu lagajc luj.”

10 Nani rajp yäl'sanälajz, dini gun latsiaj lo resa'ni. Ni'cni yäl'sanälajz rusooob releii ni caj lo xtidx Dios.

11 Colyejn guiraa redee, sa'csi anajntu xho najc redxej ni nabajnnu naj, anajntu alagojl or guibajnnu lo bacal sa'csi abidzungenajxhru dxej che laanu nen dojl lo dxej che huililajznu.

12 Aguxhinduxh, asiädgajxh bianij. Ni'cni cuääz jiennu redzuun guiidx ni rajc lo xcäy, te jientisnu redzunsac ni rajc rdxee, lo bianij.

13 Guibansa'cnu si'c riājł guibajn rebejn rdxee, na'c guibanu lo yälrä', niclaza lo yälbiejy, na'c guidiesnäjnu bejn ni di gac chäälnu, na'c ga'pnu rebis, na'c guidxagdilu resa'nu, na'c chuguij lajznu xhixten resa'nu.

14 Ni'cni col'ca' xcälrnibee Jesucrist te na'c guntu redojl ni rlajz gun tiejxhtu.

14

Na'c guiniyajtu rebejztu

1 Colnii didxdoo lo rebejn nani di gumbesa'c xtidx Dios, na'c tilnäjturenii.

2 Sa'csi yu' reni rililajz nani sajc gaureni guira'ti xhi cos, niluxh nani gajd sutijp lo yälrililajz, ganaxtis berduur rajwni.

3 Nani rajw guira'ti, na'c guidxechnäjni nani di gau guira'ti; luxh nani di gau guira'ti, na'cza guiniyajni nani rajw sa'csi Dios aguleza bejnga.

4 ¿Chuxh luj te guiniyajlu lo xmos te bejn, ä? Sugäb lagajc xlamni lojni la laaca rujnni o la xhet laadi rujnni. Luxh sujnni laaca sa'csi Dad Jesucrist sujn sutijp lastooni.

5 Tej bejn naa sajcru tej dxej lo stee dxej, dxejc ste'ca bejn rchalo guiraa redxej najc tebloj. Xhet najcdi, tejga bejn sugunpac lagajc xhigabni.

6 Nani rapda te dxej, rujnnini te guiliä'pni xpala'n Dios, luxh nani di gunni, rliä'pzani xpala'n Dios sa'csi dini gapda te dxej. Luxh nani rajw guira'ti, rajwni te rliä'pni xpala'n Dios, sa'csi rudeedzani xquixtios lo Dios; nani di gau guira'ti, nez lo Dios dini gau, rliä'pzani xpala'n Dios, rudeedzani xquixtios lo Dios.

7 Sa'csi nicla tejnu dinu guibajjn xcuentcanu, nicla tejanu dinu guet xcuentcanu.

8 Palga nabaannu, nabaannu xcuent Dad Jesucrist; palga guetnu, rejtzanu xcuent Dad, Jesucrist.

Ni'cni palga nabaannu, o palga guetnu, la_tis na-
j_cnu rexp_en Dad, Jesucrist.

⁹ Ni'cni gujt Jesucrist, ni'cni guba_nsaczani, te sajc
gacni Dad xten reb_engut, n_ajza Dad xten rebejn
nani nabaj_n.

¹⁰ Dxejc luj, ¿xhicuent cubeelu bejtzlu, ä? O
¿xhicuent rdxe'chlu rhuiilu lojni, ä? Ni guiraga-
j_cnu tednu nez loj Jesucrist cadro cueni te gunni
yäl_guxhtis loonu.

¹¹ Sa'csi scree caj lo xtid_x Dios:
Si'ctis ni naba_nä, rniliäpac lojtu, räjp Dad Dios,
guiraa reben_e guedxliuj suzuxhijbreni loä,
luxh guiragajc ro'reni sicäjp narä nacä Dad Dios.
¹² Ni'cni guiraanu, tejganu sudeednu cuent loj
Dios xcuent nani biennu.

Na'c guzällu bejtzlu

¹³ Ni'cni na'cru cubeenu sa'nu. Maazru hueen
jiennu xhigab ne_n lastoonu xhetliidi jiennu ni gun
jiajb resa'nu lo dojl.

¹⁴ Narä nanä, racbeäpac guira'ti najc hueen. Je-
sucrist Xtadnu baluii narä si'c. Luxh palga yu' chu
tej ni rchalo dini gac hueen, par laatisni dini gac
hueen.

¹⁵ Palga la'tu guntu gac-huin lajz te sa'tu sa'csi
yu' xhi rajwtu, dirutu chasanäj xnezyuj yäl_sanälajz.
Na'c gunlu gunijt te sa'lu xcuent nani rajwlu, sa'csi
agujt Jesucrist xcuentni.

¹⁶ Ni'cni na'c gusaanlu guiniyajreni nani najc te
cos hueen par luj.

¹⁷ Sa'csi xcäl_rnibee Dios dini gac xcuent yäl_rrajw,
niclaza xcuent yäl_rä'; xcäl_rnibee Dios najc xcuent
te yäl_nabannya nez loj Dios, n_ajza yäl_rbedxilajz con
yäl_rbalajz xcuent Sprit D_xan xten Dios.

18 Sa'csi nani rujn si'c lo xtzuun Jesucrist, bejnga rchaglajz Dios, luxh rebeng guedxliuj rniiza didxsa'c xcuent sa' bejnga.

19 Ni'cni chanuutis guidiilnu recos nani rujn chu yälrbedxilajz, näjza nani rujn racnäjnu resa'nu te tiobrureni loj xnezyuj Dios.

20 Na'c guntu nit xtzuun Dios xcuent ni rajwtu. Guliicani guira'ti ni rajw bejn najc naya, niluxh palga gautu te cos nani gun jiajb bejtzlu neng dojl, ni'c najc xhet laadi.

21 Hueen najc na'c gautu bääl, na'cza yätu bin, na'cza guntu jiajb sa'lu neng dojl.

22 Nani rililajztu, ni'c colyajp xcuentcatu nez loj Dios. Chicbaa nani di cubee lagajc laani xcuent recos nani rniini laaca najcni.

23 Luxh palga guntio'p lajz te bejn xcuent nani rajwni, sigubeeni lagajc laani, sa'csi dini gau xcuent yälrililajz, sa'csi xhitis ni di gac xcuent yälrililajz, lagajc ni'c najc dojl.

15

Huinälajz sa'lu

1 Nuurnu ni agusutijpnu lo yälrililajz nanab gacnäjnu resa'nu nani gajd chalilazsa'c. Di gacdi guibantisnu xcuentcanu.

2 Tejganu nanab chonälaaznu resa'nu lo xcälnabansa'cni te gacnäjnu chalilajzrureni.

3 Sa'csi nicla Jesucrist dini nibajn xcuentcani, luxh si'cni caj loj xtidx Dios: “Redidxyaj ni guniya-jreni lojlu biajbreni yecä.”

4 Guiraa rediidx ni cuaj lo guijt_z galooli, cua-jreni te guluiireni nuurnu te ga'pnu yälsutijp näjza yälrustioblajz te gacza guibääznu lo xtid_x Dios.

5 Dios rusutijp lajznu, Dios rutioob lastoonu. Rniabä loj Diosga gacnäjni guntu tejtis xhigab xten Jesucrist con resa'tu.

6 Te dxejcti tejtis gac xse'tu guiliä'ptu xpala'n Dios, Xtrad Jesucrist.

Gusule' xtid_x Dios loj rebenzijt

7 Ni'cni colca' resa'tu, renani ahuililajz xtid_x Dios sigajc cua' Jesucrist nuure te guiliä'pnu xpala'n Dios.

8 Sa'csi narä rniä lojtu, biääd Jesucrist te guj_cni si'c te mos loj rexpen Israel te baluiini xcuent didxgului xten Dios te gusojb rediidx nani bia'n Dios loj retoxtadgoldoonu,

9 näjza par rebenzijt, te guliä'preni xpala'n Dios sa'csi baluilojni xcäl_rulaslajz Dios lojreni, si'c ni caj lo xtid_x Dios:

Ni'cni siliä'pä xpala'nlu nez loj rebenzijt, soläza dij lojlu.

10 Dxejcti stee lajt rniini:

La'tu benzijt, colguibalaznäj rexpenä rexpejn Israel.

11 Stee lajt cajza:

Guiraatu, rebenzijt, colguiliä'p xpala'n Dad, suguiliä'pza guiralii rebejn xpala'nni.

12 Stee huält guniiza Isaías scree:

Siricaj te xagdoo toIsaí,

näjza te ni chäs te guinibeeni loj rebenzijt,

laani cabäjz rebenzijt.

13 Naj rniabä lo Dios ni rudeed yälrbäzlajz, te laani gacnäj guibalajztu, cuecdxilajztu, sa'csi

salilajztu, te tiobru yälrbäzljaz ni rajptu sa'csi Sprit Dxiän xten Dios yu' neñ lastootu, luxh laani rajpni yälrnibee.

¹⁴ Luxh xcuent la'tu rebetzä, anancheä nabansa'ctu nasinduxhtu, arajcza rulijdxtu sa'tu,

¹⁵ luxh loj guiitzre bacuaä gaii didxnaj xcuent tiop-chon cos, te gusnaä lajztu. Runä si'c xcuent yälrlulaslajz ni baniidx Dios löä

¹⁶ te gacä xpen Jesucrist ni rusule' diidx loj rebenzijt. Ni'cni cagusulesa'cä xtidx Dios lojreni, te xca' Dios rebenzijt si'c te gojn ni rudedä, sa'csi agujcreni beñnaya sa'csi rbäjz Sprit Dxiän neñ lastooreni.

¹⁷ Ni'cni xcuent Jesucrist abidxälä xhicuent guiniduxhä didxro xcuent recos ni najc xten Dios.

¹⁸ Sa'csi dina guiniä diidx xcuent xhi stee cos, ganaxtis xcuent xho gucnäj Jesucrist narä, luxh xcuent ni'c basoob rebenzijt diidx, huililajzreni xtiidxni sa'csi biejn diajgreni xtiidxni, bahuiizareni rextzuunni,

¹⁹ con yälmlaagwr xten redzunro, resenro, ni gujc con xcälrnibee Sprit Dxiän xten Dios. Ni'cni lo guedx Jerusalénli, näjza guideb gabi ro'c, lo guedx Ilírico, guiraa nejzga abasule'ä xtidx Jesucrist.

²⁰ Si'cza guyu'ä ganduxh gusule'ä xtidx Dios xhet cadro ahuisule'direni xtidx Jesucrist, alga ganax cadro gajdreni gumbee Jesucrist, te na'c gunä dzuun cadro gusloj cayujn ste'ca bejn dzuun.

²¹ Te gacni si'cni caj lo guiitz:

Renani rutliidi bij diidx xcuentni, suhuiipacreni lojni,

luxh renani gajdpac diajgreni jiejn xtiidxni, sacbecheereni xtiidxni.

Rujn Pabl xhigab chääni guedx Roma

22 Ni'cni balti huält badxojn Dios narä jiädhuiä lojtu.

23 Luxh naj sa'csi abaluxä xtzunä guideb nezree, näjza sa'csi agujc balti ijz rlazduxhä jiädhuiä lojtu,

24 naj che cha'a España siädhuiäpac lojtu. Che tedä, jiädhuiäpac contu te ganid guibalaznää la'tu, dxejcti gacnäjtu narä te cha'a España.

25 Naj sia'a guedx Jerusalén te chanää xcoobr rexpejn Dios ni yu' ree loj rebejn ro'c.

26 Sa'csi rebejn Macedonia näjza reben Acaya rlaizpacreni guxhalreni te coobr loj rebenproob ni yu' lo reni huililajz xtidx Dios neñ guedx Jerusalén.

27 Bejnreni xhigab hueen gunreni si'c, luxh guli'careni, sa'csi yu' xhi nazääbreni lojreni sa'csi rebejn Jerusalén najc reni baxhal xtidx Jesucrist lojreni, naj laaca rujnreni cayacnäjreni reben Jerusalén con xhixtenreni.

28 Ni'cni che chasa'nä meel lojreni dxejc tedä lajdxtu, jiädhuiä contu, dxejc cha'ä España.

29 Luxh ananä che jiälä lojtu, li guidxa lastoä xcäl'nasa'c xtidx Jesucrist guidzunä lojtu.

30 Rebetzä, rniabduxhä lojtu xcuent xtidx Dad Jesucrist näjza xcuent xcäl'rinälajz Sprit Dxan xten Dios, colguidxagsa'tu, te colgacnäj colcuedx-guiniabtu lo Dios xcuentä.

31 Colnab lo Dios te guslaani narä loj reben Judea nani di gusoob xtiidxni te saru gun reben dxan ni yu' Jerusalén te xca'reni ni chanää lojreni.

32 Te cabaa lazä guidzunä lojtu, sa'csi rlaizpac Dios jiälä lojtu, te lalni yu'ä lojtu siälyuä, susilazäza con la'tu.

³³ Dios ni rbecdxilajz bejn gacnäj guiraatu. Sug-acni si'c.

16

Ruxhalni xtixtios lojreni

¹ Colgacnäj bisiajnnu Febe. Nane're bejn dzunduxh neñ guidoo ni tre' Cencrea.

² Colca'ni xcuent Dad, Jesucrist, si'cni riäj gun bejn gacnäj renani rililajzpac xtidx Dios. Colyacnäjni lo xhitis nani guiquiinni, sa'csi laani gucnăduhxni xhidal rebejn, năgajcza nară gucnăjni.

³ Ruxhală xtixtios lo Priscila năjza lo Aquila, ni racnäj nară lo xtzuun Jesucrist.

⁴ Laareni nicăjpreni niejtreni xcuentă, ni'c rudedă xquixtios lojreni, luxh xhet narătis, năjza guiraa rebejn ni yu' lo rexquidoo rebenzajt.

⁵ Ruxhală xtixtios loj resa'ă ni rdxagsa'reni rolijz Priscila năjza Aquila. Ruxhală xtixtios loj Epeneto, ni sanălazduxhă, ni gujc benganiid ni huililajz xtidx Jesucrist neñ guedx Acaya.

⁶ Ruxhală xtixtios lo Marii nani benduxh dzuun lojtu.

⁷ Ruxhală xtixtios loj reben lădxă ni laa Andrónico năjza Junias; laareni guyunäj nară neñ latzguiib, najcreni benro loj reapost. Ganid laareni huililajz xtidx Jesucrist, dxejcti huililază.

⁸ Ruxhală xtixtios loj Amplias, ni sanălază xcuent Jesucrist.

⁹ Ruxhală xtixtios loj Urbano, ni runnäj nuurnu xtzuun Jesucrist. Ruxhalăza xtixtios loj Estaquis, ni sanălază.

¹⁰ Ruxhaläza xtixtios loj Apeles, ni abadeed balti seen rililajzpacni xtidx Jesucrist. Ruxhaläza xtixtios loj guiraa ni tre' rolijz Aristóbulo.

¹¹ Ruxhaläza xtixtios lo Herodiön ben ladxä, näjza loj resa' Narciso nani ahuililajz xtidx Jesucrist.

¹² Ruxhaläza xtixtios loj nan Trifena näjza nan Trifosa, guiro'preni cayujn xtzuun Jesucrist. Ruxhaläza xtixtios loj nan Pérsida, sanälazäni, abenduxhni xtzun Jesucrist.

¹³ Ruxhaläza xtixtios lo Rufo nani agule Dios, näjza lo xnanni, sa'csi gujcni si'c xnanäza.

¹⁴ Ruxhaläza xtixtios loj Asíncrito, näjza lo Flegonte, näjza lo Hermas, näjza lo Patrobas, näjza lo Hermes, näjza lo rebetzä ni yunäjreni.

¹⁵ Ruxhaläza xtixtios loj Filólogo, näjza lo Julia, näjza lo Nereo con bisiajnni, näjza lo Olimpas näjza guiraa rexpen Dios nani yunäjreni ro'c.

¹⁶ Colye'tz xchan loj resa'tu. Guiraa rexquidoo Jesucrist ruxhal xtixtios lojtu.

¹⁷ Rebetzä, rniabduxhä lojtu ga'ptu cuidaad xcuent renani rujn biejy te guilia' sa' bejn, nani rlanj guntu guiraloj nani najc garenca loj yäl'rului ni bisieedtu, colguibicaj lojreni,

¹⁸ sa'csi sa' rebejn ga direni gun xtzuun Jesucrist. Laareni rlanjtisreni gunreni si'c rlanj tiejxhreni; rniireni didxdoo, diidx ni rgudxguel diajg bejn te rusgueereni lastoo rebejn nani di susin.

¹⁹ Guiranejz abire'ch diidx xcuent xho rusobsactactu xtidx Jesucrist, ni'cni rbaa lazä, ni'cni rlazä gactu nasiñduxh xcuent recoshueen, luxh si'c báz xhet ganditu xcuent recoguijdx.

²⁰ Luxh Dios nani ruscuecdxilajz bejn siojb guta'cwni be_{nd}xab xhan ni'tu. Gacnäj Dad Jesucrist la'tu.

²¹ Timoteu nani racnäj narä lo dzuun, ruxhal_l xtixtios lojtu. Lucio, Jasón, näjza Sosípater, be_nladxä, ruxhal_za xtixtios lojtu.

²² Najrä Tercio, ni cagucuaä gui_{jt}zre xcuent Pabl, ruxhal_äza xtixtios lojtu xcuent Jesucrist.

²³ Ruxhal_za Gayo xtixtios lojtu. Rbääznu rolizni, luxh rudeedzani rolizni guidxagsa' rebe_n guidoo. Ruxhal_za Erasto, ni najc tesoreer xten guejdxre, xtixtios lojtu, sigajcza bejznu ni laa Cuarto.

²⁴ Gacnäj Dad Jesucrist la'tu. Sugacni si'c.

Rediidx lult xten Pabl

²⁵ Colguiliä'p xpala'n nani sajc gusudzu'tz la'tu loj xtiidxni nani basule'ä, näjza loj xtidx Jesucrist xcuent re_xhigab ni naga'tz galooli,

²⁶ naj abaluiloj rediidxga lojtu; näjza xcuent ni bacuaa re_profe't galooli; si'c najc diidx ni bia'n Gueb Dios ni nabaj_n par te_ppas loj re_xpej_nni, agusule'ni loj guiraa rebe_n guedxliuj, te gusoo-breni diidx sa'csi rililajzreni xtiidxni,

²⁷ colguiliä'p xpala'n ni najc tejtis Dios ni nanduxh. Suguiä'pnu xpala'n Dios xcuent Jesucrist. Guiliä'pnu xpala'n Dios par te_ppas. Sugacni si'c.

Xtidxcoob Dios ni biädinä dad Jesucrist
New Testament in Zapotec, Mitla (MX:zaw:Zapotec,
Mitla)

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

5cff1274-8dc3-5398-a94d-f6033bb363c9